

出圍城日記
西域水道記校補

第三冊

出圍城記

甦庵道人譔

道光壬寅五月英人船入江南界十二日連陷寶山上
海兩城旋退至烏船洲洋面停泊有入揚子江至江甯
之謠揚子江入海之口崇明以內北岸爲通州之狼山
南岸爲常熟之福山兩岸相距寥濶皆設有重兵越福
山至江陰之鷺鼻嘴沙灘回互江面僅濶五里過此則
北抵揚州南達鎮江爲三郡扼要之地徐州總戎鎮江
參戎帶兵防守監司周頊勸三郡富民共輸金十萬鳩
工堵塞連木簾而爲梁伐大樹以沈水復集鎮江衛所
減運糧艘五十束油葦於上爲縱火計僉以爲鐵鎖橫

江不若是之固矣初京口副都統海凌聞浙之乍浦失
守殺駐防旗兵殆盡驚懼無策新納一雛姬恐難自保
遣與母妻寄居他郡已身亦不敢居署中移住故將軍
府猶恐人知又移至府旁吉祥寺安牀佛殿後每夜親
兵四十執刃圍護始能安寢及聞寶山上海之失愈益
驚懼從此絕不出城一步不但此也青州旗兵四百本
駐東馬頭守礮臺亦調入城分居四城樓以故東馬頭
至圖山一帶設礮之處皆空堡無兵五月杪參贊大臣
高慎帶兵二千來援駐陽彭山湖北提軍劉允孝率兵
二千先參贊至沿江屯駐軍容頗整忽制府牛鑑牒至
謂英船前往山東移防登萊時六月初一日劉提軍行

至清河知山東無事始回京口初六日制府牛自至蘇
州匆匆飭守令示意富民十餘人令各輸金萬犒英軍
俾不登岸及聞富民十九遷徙倉皇回江甯是日予猶
與諸同人集城南道院萬不料英船能猝然入江也卽
入江狼山福山鷺鼻嘴等處皆有重兵且興工役亦難
飛渡豈意入江所經各州縣制府皆令不得開礮遺之
牛羊卽揚帆徑過而牧令將弁自幸無事無不掩旗息
鼓先行迴避絕不使一諜來告哉此等禦敵之法百姓
不知惟制府自知之鎮城富庶之名久著非金不保然
輸此十餘萬金亦甚易使兵不戰令可猝下使民輸
金令必先申制府於此少經營耳初七日予族弟來約

同避地金壇因買舟使大兒先往覓寓舍舍館定卽以原舟來接眷屬是時民船多被官兵占住船鮮入境者初八日居民遷者塞塗僅開城兩時許而城門亦止開一扇駐防旗兵交刃對立使行者匍匐從刃下過稍舉首卽觸刃流血被面除隨身衣服外一物不許攜帶帶者立行奪下人方絡繹突然閉門有子弟出而父兄閉入城內者有妻女出而丈夫閉入城內者城內外呼號之聲慘不忍聞初九日計大兒當回晨起雇肩輿三錢六千擔夫二錢二千與家屬至南城門口候開城南城去予家不過數百步而價昂若是在一門人家坐候一日城門不開日暮始知西門略開片刻卽閉已無及矣

復以錢數千雇肩輿擔夫載家屬歸假一舊族祠宇暫
住此祠去予家甚近而地較僻故避居其中初十日副
都統縱兵殺人目爲漢奸漢奸對敵人言副都統誤以
爲對滿洲蒙古言凡他邑人在城中習懋遷者充工役
者作僧道者爲僕役及行乞者以非土音均被縛去略
一詰問卽殺十三人於小教場其眾人具保狀證爲良
民者不得已竿擲城外免於斧鑕復死於傾跌而里巷
中曉行者莫行者與夫行城下者不問何人胥用鳥槍
擊斃草菅無算方閉城之先副都統卽疑滿城皆漢奸
日捉數人送邑令拷訊邑令錢燕桂訊明釋放卽指錢
令爲漢奸乘其出城閉門不納城中守土官惟知府一

人與副都統爲姻婭聽其所爲無能阻止十一日早聞江中銅礮聲出門見高檣大颿突出女牆丈許檣間煙氣騰騰火輪三版等船已向甘露港西津渡進泊十二日城中炊煙寥寥蓋城閉市亦閉饑民無處市米人情洶洶疑副都統欲盡殺漢人而後止監生吳學增家有米四百石貯西城外呈請郡守祥麟運入安民郡守轉請副都統仍不開城謂開城吾輩命卽休不能顧百姓百姓有違言卽是漢奸吾兵足以殺之其實閉城禁人出入尙開西小門進兵米此數百石米帶入甚易副都統居心叵測無怪人人疑懇也日晡在城孝廉諸生十餘人復至府署爲饑民乞命署中空無人惟校官四分

日到署伴太守太守不肯復與都統言眾乃太息而歸
英船住江中日放空礮十餘聲十四日已刻敵登岸烏
槍一發參贊提督兵卽退竄乃攻北城放礮六府署後
雉堞轟塌適城隅有繩梯一是駐防旗兵縋人出城借
索重貲者竟忘撤去駐防兵聞礮卽逃棄刀槍戎衣盈
路敵乘虛攀援而上開北城羣擁而入止四城樓青州
兵與之巷戰敵被殺傷數百人青州兵亦死二百餘實
皆敢死士惜乎城失勢弱後援無人尤惜不令守礮臺
無由放礮擊敵船聽其深入副都統調駐城中不過事
急之時欲借其力擁護而逃徒令併命於城闔之中冤
哉副都統聞北城破乘籃輿至南城知府祥隨至請開

城門放難民副都統畏人指摘意欲獨竄仍不允反以
鳥槍擊眾眾驚散知府憤然策馬回時已不能返署赴
縣學自經一李姓書吏解下扶入舟中復蘇遂至丹陽
副都統既出敵眾沓來不移時婦女屍滿道上無不散
髮赤體未死者多被擁抱而去生死離散目不忍觀皆
見沮于副都統屢欲出城不得者也旗營中亦有未及
出城者叩戶乞留家家噪逐無已跳入空宅中墮厠箚
觸樹石者甚夥匿久則多餓死承塵上檐霰閒婦女不
能踰垣又難匿跡每伏池內強半溺死或出水潛逃浮
萍黏滿頭面望之如藍面鬼然忘其身以及其家視戰
死者相去奚啻霄壤民間寇至捐軀者何氏一門三人

已故生員旌孝子謹銘妻節婦魯氏生員西銘妻張氏
謹銘子源豫妻魯氏同時鍵戶投繯死童生何恩沐妻
錢氏投井死生員張曾得妻萬氏子元叔妻萬氏並一
子一女共投一井死生員許光達妻茅氏途遇英兵避
入市廛中縊死故生員笪淵妻郭氏與其戚李棟妻笪
氏棟三女又馮錫銘妻董氏錫恭妻張氏同墜樓不死
復同縊死袁信立妻節婦李氏吞鍼不死刺心死舉人
徐元佐妻馬氏年七十餘縊死李祥甲妻鄒氏子勳奎
妻吳氏聯潤妻吳氏先溺死幼男女四人後同縊死劉
靜先妻李氏並子女又劉式之女善之女劉克端女盛
岐山女俱投井死郭圭妻喬氏圭死未葬英兵入室裂

棺見屍子亦被虜氏投河死柳應增妻戴氏應元妻張氏袁量卿妻張氏同一子李苓生妻錢氏有身戴熙和妻袁氏虞鳳岐妻何氏朱靄如妻趙氏李春亭妻黃氏張增妻華氏法意妻柳氏童鑑銓妻陳氏鄒士荃妻時氏同二女張樹之妻節婦黃氏程如川妻李氏並投井死張金鑾妻茅氏同女李映奎妻張氏馬步洲妻化氏張翰魁妻高氏胡厚齋妻張氏楊鑑妻張氏並投河死茅清泉妻張氏史彭齡妻沈氏並攜女投江死胡鎔妻李氏投二女於井與胡鐘妻袁氏同縊死耿拱辰妻陳氏包立德妻王氏吳壩妻張氏何鐘妻童氏何廷幹妻節婦梅氏程廷渠二女徐允元女並縊死又有卜邽巷

程氏童子英兵至其家其母匿之牀後兵將犯其母呼號而出中火槍死城中文武官旣逃罪囚七十餘人亦破獄去敵入旗營焚官署馬房數十處其陸路提督郭居府署分遣黑白兵守四門府學亦佐敵兵粟主多遭毀棄裂書以爲廁籌翌日質明放礮鼓吹自是日始每早晚必鼓吹俱在府署前之鼓樓上居民導之刼掠無市不空無家不破敵兵止取金銀衣物悉歸導者導者多其家之親族鄰友與夫豢養僕人十七日敵提督出示禁刼掠而刼掠如故四鄉男婦聞風而至土匪十倍於敵敵但焚營房而西門橋至銀山門無日不火重垣峻宇盡成瓦礫場皆土匪所爲初放火時英弁曾縛十

五人於觀音庵大樹上鞭背流血而縱火如故弁亦無法可施惟言經過數省人心之壞未有如此郡者英兵沿街捉人肩什物負腐屍遇者難免人多不敢出戶而劫物者仍不斂迹然此猶市井小民其平日儼然在衣冠中爲膠庠士子公然作賊者指不勝屈有一諸生赴府署上書爲敵所擯又有諸生二十餘人具牒乞充里長敵提督坐鼓樓下親給執照分持而去此外執鷄鴨爲贄乞大英護照四字黏諸門壁者所在多有甘心從敵無非欲假勢保身家劫貲財廿一日薄晚府前發鼓數通奏樂徹夜黎明鼓吹前導敵提督乘坐知府輿出城四門敵眾亦隨出敵提督上船去留其總兵叔得者

駐札北固山亦出示禁四鄉土匪入城北城已被敵劘斷直達甘露港令無阻礙敵仍不時往來城中然敵船多往江甯留京口者僅數船其眾已無多矣廿三日奴子自豐城鄉來見主人全家具在喜出望外堅請出城時丹陽張官渡築壩河道不通近城無舟車仍使下鄉往覓廿四日越河大港鄉民二千餘蠶擁入城持械搶劫勢不可當予家敵兵來一次破篋搜索見無金銀卽去鄉民連來四次衣物雖空書籍猶存至是拋擲踐踏淨盡聞信頓足無力救護半生辛苦損衣食費積書盈室屢更屢易皆罕購善本一旦喪失痛欲身殉相識者勸予甯波范氏天一閣藏書已不可問聚散有數何不

達觀一切適奴子自豐城驅車四輛至蓋予友避居其間代爲料理者悵然攜家出城登車雲遮烈日一路涼爽無暑氣五十里至豐城星光雜鐙火矣吾友立所居門外老柳下執手慰問炊豆粥以待又假伊族人樓屋三楹以棲家累窮途大可感也去豐城卅里有寶堰鎮予門人有避居其地者廿六日使奴子屬覓金壇船午後奴子持門人書至知己買舟待發廿七日辨色登車至寶堰停車河干門人至堅留一飯卽在舟中飯畢門人別去舟子解纜逆風行九十里三茅峯時與船低昂抵金壇水關閉矣明日奴子進城訪大兒寓所聞已附船將往鎮江沿岸急呼舟尙未發大兒立岸上予舟已

進水關相見悲喜交集廿餘日不得家中消息焦急幾死不意一家十口無一損也假館直街內弟寓中此寓本爲族弟賃者而族弟竟未來想是敵船猝至避往他所予在圍城中六日城破又住十日家破而家人避居僻地未見一敵兵每人每日熬老米粥三合延命怡然不以爲苦空身出城盜不屑顧較先出者之被差役詐錢盜賊胥篋轉爲安適失馬未嘗非福區區衣物亦何足言鎮城經此番蹂躪破碎不堪非敵人破碎之鎮人自破碎之也人類雖眾大約不出三等曰兵曰民曰士而在鎮城則三大害卽在其中駐防旗兵本名鎮海兵副都統銜亦是鎮守沿江沿海並管水師三營蓋守海

口則拒寇於門外是上策入江則放寇入門守之亦是下策至城下則引之入卧榻尙可守乎乃副都統一聞敵至擁兵閉城礮臺所貯大礮十八子母礮入遠擲江外以資敵人兩手牢握四門鎖鑰西門破則率兵開東門走北門破則率兵開南門走而城中百姓禁閉不許出城城破刃死不破餓死是欲盡死百姓而專生官與兵也誤國殃民莫此爲甚且兵不用力總由安居城中養既久視爲分所應然騎兵步卒二千餘人合之間散七八千人併七八千人之力殺深入之敵眾未必不能而乃已正攻城午初卽下紛然各鳥獸散逃至丹陽羣向陽令索口糧恬不爲怪京口不用兵者垂二百年